

25 MAC 2021 (KHAMIS)

Pengusaha maahad tahfiz lega

Penjelasan JKN Pahang mengenai survelan Covid-19 rungkai kekeliruan

Oleh NIK AMIRULMU'MIN NIK MIN

KUANTAN

Pengusaha maahad tahfiz dan pondok persendirian di negeri ini berpuas hati dengan penerangan Jabatan Kesihatan Negeri (JKN) Pahang berkaitan survelan Covid-19 terhadap pelajar institusi itu di Pahang.

Timbalan Pengerusi Majlis Taawun Pusat Pendidikan Islam Negeri Pahang (Mantap), Roslan Md Esa berkata, penjelasan Ketua Penolong Pengarah JKN Pahang, Dr Suzana Mohd Hashim telah merungkai kekeliruan dan keresahan pengusaha pusat berkenaan dan para ibu bapa.

Menurutnya, pada pertemuan di Bera pada Selasa, JKN Pahang mengemukakan data terperinci berkaitan perkembangan



Sesi pertemuan antara wakil maahad tahfiz dan pondok persendirian di Pahang bersama Norol Azali dan wakil JKN Pahang di Bera pada Selasa.

semasa Covid-19, asas kepada pelaksanaan survelan itu dan kaedah pelaksanaannya di peringkat daerah berkaitan.

"Alhamdulillah, sebahagian kekusaran pihak pengurusan tahfiz persendirian di Pahang ini dapat dirungkai dengan penambahbaikan yang akan dilakukan oleh pihak JKN," katanya melalui satu kenyataan pada Rabu.

Pertemuan tersebut dihadiri Exco Kerja Raya, Pengangkutan dan Kesih-

tan Negeri Pahang, Datuk Seri Norol Azali Sulaiman; wakil daripada pihak pusat tahfiz, JKN Pahang dan Pusat Kesihatan Daerah (PKD) Bera.

Roslan berkata, pihaknya menyambut baik keputusan JKN untuk menanggukkan sementara survelan kepada semua maahad tahfiz dan pondok di negeri ini.

"Penangguhan itu dilakukan sementara sehingga sesi taklimat kepada wakil pengusaha dilaksanakan.

"Pihak JKN juga akan membuat penyelarasan dan makluman secara rasmi kepada semua maahad tahfiz dan pondok sebelum survelan ini dibuat bagi mengelak kekeliruan," katanya.

Tambahnya, pengusaha maahad tahfiz dan pondok persendirian di negeri ini akan sentiasa memberikan kerjasama yang terbaik kepada JKN Pahang dan semua petugas barisan hadapan bagi melawan pandemik Covid-19.

"Semoga ALLAH merahmati dan memelihara semua petugas barisan hadapan yang sentiasa gigih dan dedikasi dalam melaksanakan tugas mereka.

"Juga diberikan perlindungan dan keselamatan kepada semua warga maahad tahfiz dan pondok persendirian negeri Pahang, rakyat Pahang dan Malaysia amnya," katanya.

Sebelum ini, Mantap membantah tindakan survelan Covid-19 kepada warga tahfiz dan pondok persendirian yang disifatkan sebagai tindakan *double standard* ketika kelonggaran sudah diberikan kepada semua sektor.

Bantahan dibuat susulan tersebar surat arahan Survelan Covid-19 daripada JKN Pahang.